

AWIG-AWIG



DESA ADAT SEMINYAK

KELURAHAN SEMINYAK

KECAMATAM KUTA – KABUPATEN BADUNG

CAKA WARSA 1919

TAHUN 1997

BANTANG DAGING CAKEPAN AWIG-AWIG

DAGING CAKEPAN AWIG-AWIG i

MURDHA CITTA ii

SARGA I : ARAN LAN WEWIDANGAN DESA 1

SARGA II : PATITIS LAN PAMIKWUKUH1

SARGA III : SUKERTA TATA PAKRAMAN 1

 Palet 1 : Indik Krama 1

 Palet 2 : Indik Prajuru 4

 Palet 3 : Indik Pasamuan 5

 Palet 4 : Indik Kulkul 7

 Palet 5 : Indik Druwen Desa 8

 Palet 6 : Indik Pamitegep 9

 Kaping 1 : Karang Tegal Lan Carik 9

 Kaping 2 : Papayonan 9

 Kaping 3 : Wewangunan 10

 Kaping 4 : Wewalungan 10

 Kaping 5 : Bhaya 10

 Kaping 6 : Panyanggran Banjar 11

SARGA IV : SUKERTA TATA AGAMA 11

 Palet 1 : Indik Dewa Yadnya 11

 Palet 2 : Indik Resi Yadnya 15

 Palet 3 : Indik Pitra Yadnya 17

 Palet 4 : Indik Manusa Yadnya 20

 Palet 5 : Indik Bhuta Yadnya 20

SARGA V : SUKERTA TATA PAWONGAN 22

 Palet 1 : Indik Pawiwahan 22

 Palet 2 : Indik Panyapihan 25

 Palet 3 : Indik Sentana 26

 Palet 4 : Indik Warisan 28

SARGA VI : WICARA LAN PAMIDANDA 29

 Palet 1 : Indik Wicara 29

 Palet 2 : Indik Pamidanda 30

SARGA VII : NGWAH NGWUHIN AWIG-AWIG 31

SARGA VIII : PAMUPUT 32

PAKELING 34

LEPIHAN 35

MURDHA – CITTA AUM – OM

“Om Swastyastu, Om Awighnamastu nama sidham”

Mungguing desane puniki wantah pawakan pasayuban krama desane rawuh kulawarga pawongannya. Manut dresta desane kaanggehang bhuana agung, pawongannya suang-suang pinaka bhuana alit. Adung patemon khang bhuana ruwa kawentenannya kauripan sekala niskala, sinanggeh murdhaning prayojana pangriptaning awig-awig.

Sotaning bhuana agung, desane wantah pawakan “bhuana maurip” jangkep saha Tri Hita Karana luire:

1. Parhyangan : sahanan Kahyangan panyiwian desa genah ngarcana Ida Hyang Widhi maka jiwatman desane.
2. Palemahan : tanah kekuwuban saha dagingnya, sinanggeh angga sarira taulan desane.
3. Pawongan : warga desane sami, pawakan Tri Kaya awanan desane sidha molih maprawerti.

Sampun marupa pamutusing paseban Krama DESA ADAT SEMINYAK, gunawe Awig-Awig Desa Pakraman, pinaka sepat siku-siku pamuput, wastu kasidayan prayojana mami kabehan, pada mangidepang rahayu, amagehaken kadi tata agaming Awig-Awig iki.

SARGA I ARAN LAN WEWIDANGAN DESA

Pawos 1

1. Desa Adat puniki mawasta **DESA ADAT SEMINYAK**.
2. Jebar muang pangeretnya mawates nyatur, luire:
 - 2.1. Sisi wetaning desa ngaran : Tukad mati/Desa Adat Denpasar
 - 2.2. Sisi kiduling desa ngaran : Desa Adat Legian
 - 2.3. Sisi kuloning desa ngaran : segara/Samudra Indonesia
 - 2.4. Sisi loring desa ngaran : Banjar Basangkasa wawengkon Desa Adat Kerobokan.

Wates wewidangan desa adat puniki kajangkepin antuk gambaran Desa Adat Seminyak, sekadi munggah ring lepihan panampih (lampiran) awig-awig puniki.

3. Wewidangan palemahan pinalih dados 2 (kalih) Banjar Suka Duka, luire:
 - 3.1. Banjar Seminyak
 - 3.2. Banjar Kubu Tatag Seminyak

SARGA II PATITIS LAN PAMIKWUKUH

Pawos 2

DESA ADAT SEMINYAK puniki, ngemanggehang tur mikwukuhin:

1. Pancasila
2. Undang-undang Dasar 1945, pamekas Pasal 18.
3. Peraturan Daerah No. 06 Tahun 1986 Propinsi Tingkat I Bali
4. TRI HITA KARANA , manut tatwaning Bhuana Angung

Pawos 3

Sane kapatitis olih desane, luire:

1. Mikwukuhin miwah ngrajegang SANG HYANG AGAMA
2. Nginggilang utawi ngotamayang prawertining Agama Hindhu
3. Ngrajegang sukertaning desa, katekaning pawonganya sekala kelawan niskala

SARGA III SUKERTA TATA PAKRAMAN

Palet 1 Indik Krama

Pawos 4

1. Sane kabawos krama desa, inggih punika warga hindhu sane sampun marabian, mabanjar Suka-Duka, tur sareng nyungsung ring Kahyangan sane kaempon antuk Krama DESA ADAT SEMINYAK.
2. Sajaba punika kabawos utawi kasengguhang tamiu.

Pawos 5

Tata krama desa adate ring seminyak, wenten kalih soroh, luihnya:

1. Krama ngarep, ngaran warga sane sampun nyaluk dharmaning Grehasta utawi mawiwaha, tur sampun tedun makrama Banjar suka-duka.
2. Krama balu ngaran silih sinunggil warga Krama ngarep lampus utawi palas nyapihan.

Pawos 6

Tingkah ngawitin ma-krama Desa, wenten tigang soroh, luihnya:

1. Mawit saking sampun jumenek ring Desa Seminyak
2. Mawit saking ngrereh pangupajiwa ring wewidangan Desa Seminyak, wiadin matilar sangkaning rahayu saking desane sewosan.
3. Malarapan sangkaning matemu tangan utawi ngater majangkepan, mapabuncingan, ma-krabkambe, mawiwaha ngiketang pratisentana, sekadi sampun munggah ring wiwit 1 muang 2 ring ajeng.

Pawos 7

Panemayan tedun ma-krama Desa luihnya:

1. Melarapan antuk pa-wiwahan utawi ngarereh pangupajiwa, utawi metilar sangkaning rahayu saking desane sewosan, tur sampun katedunang makrama Banjar Suka-Duka.
2. Sane dados ngaranjing ma-Banjar Suka Duka, yening sampun:
 - 2.1. Mawaneng tigang sasih saking pawiwahan.
 - 2.2. Tinut- saturut ring sedaging Awig-Awig, paswara lan pararem Desa, tur misadia nawur pamogpog, maruntutan Upakara daksina Pejati ka Pura Desa/Bale Agung.

Pawos 8

Sahananing warga sami, keni ayah-ayah, luihnya:

1. Ayahan ngarep saking Krama ngarep.
2. Ayahan Balu, saking Krama Balu.
3. Ayah roban, saking Krama dandanan waris, (1) miwah (2) ring ajeng, sane sampun munggah Deha-Teruna, tur kapupulang dados Sekaa Teruna.

Pawos 9

Tategenan Krama Desa, sekadi ring sor:

1. Krama ngarep keni ayahan muang papeson mamungkul.
2. Krama Balu tan keni papeson, kemawon ayah nyibakin.
3. Banjar Suka-Duka utawi pangempon, keni tategenan manut wiguna, sawireh Banjar inucap pinaka tangan swukuning Desa.

Pawos 10

1. Yaning wenten pakaryan sane abot patut karombo, dados karombo olih sowang sowang krama Desa, utawi nganggen undagi, tur prabeyannyane ka-etang antuk Banjar Suka-Dukane punika sowang-sowang.
2. Prade wenten sinalih tunggil krama Banjar Suka-Duka, nenten nganutin sadaging paswarane kadi ring ajeng, wenang prajuru Desane niwakang pamindanda;
 - 2.1. Satunggil wenten lampus ring Banjaran inucap, patut keni danda palaletahan panwukun setra 1700 (sepa satus) wijihan jinah bolong.
 - 2.2. Prade panwukun Setra inucap nenten katawur, mawaneng kalih pasangkepan keni danda, tur selaminnyane durung nawur panwukun setra nenten kedadosang mendem ring setrane ring Desa Seminyak.
 - 2.3. Yan prade taler kanton memurug, Krama Desane wusan maweh kasukertan sakaluire ring Bajar inucap, utawi ka-wusang ma-krama Desa ring Seminyak.
 - 2.4. Taler yaning prade kanton mamandel, wenang unggahang dadosang prakara, raris tunasang pematut ring sang ngawiwenang
3. Prade salah sinunggil krama Banjare, nenten nganutin ngrombo pakaryan Desane, wenang Banjare ngenenin pamindanda:
 - 3.1. Keni dosa nikel ring jinah papeson-peson sekadi sane kamedalang ke Desa.
 - 3.2. Prade dadosan inucap nenten katawur, saluwirin karya suka-duka sane patut kararemin antuk Banjare, nenten kaladenin tur nenten polih paswaran kulkul, nanging ayahannyane ring Banjar kanton tetep.
 - 3.3. Prade pamidanda maka kalih punika nenten katerima, I krama Banjar wenang ngraryang warga Banjar inucap ma-banjar Suka-duka.
4. Sejawining ayah-ayah ring Desa, krama banjare taler negen ayah-ayah Suka-Duka ring Banjar. Yaning prade kapurug, wenang tibakin dadosan manut Pararem.

Pawos 11

Darmaning krama Desa tiyosan ring ayah-ayah, luihnya;

1. Krama Desa wiadin Banjar patut:
 - 1.1. Dreda matuwang ring Desa Adat Seminyak
 - 1.2. Tinut saturut ring sedaging Awig-Awig, paswara, muang pararem Desa
 - 1.3. Nenten maren ngutsahayang mangda Desa kramane prasida pageh, nyujur nganutin patitis.
2. Swadarmaning tamiu:

Tinut saturut ring sapa margin prakertin Desa Adat ring Seminyak.

Pawos 12

Patitis utawi ulih-ulihan krama Desa, kadi ring sor:

1. Polih pasayuban prajuru, ngamanggehang swadarma nganutin patitis tur mawosin sakaluwirin wicara, saha niwakang pamutus.
2. Patut nyarengin paruman Desa wiadin Banjar, saha wenang sareng mastikayang pamatut, utawi pamutus.

3. Kengin manut pa-etangan, luihnya:
 - 3.1. Mapuangkid, ngaluputin ayah-ayah Desa utawi Banjar, sangkanin ngwangunang yadnya, matepetin lara, malaluwasan mawaneng sawwuku.
 - 3.2. Nyada, utawi mademang ayah-ayah, riantukan sampun wenten sane nyada, utawi sampun mayusa 60 warsa, wiadin sangkaning pinunas ngeraga apan kena lara pinungkan.
 - 3.3. Nyuksukin, utawi nyelediyinin ayahan, punika wenang, nanging mangda sampun munggah Deha- Truna. Yening mamurug keneng danda manut pararem.
 - 3.4. Mogpog, ngaran ngetutang ayahan miwah papeson marupa arta brana, duaning seringan malaluwasan.
 - 3.5. Nguwot, ngaran numbas ayahan, ngentosin ayahan miwah papeson antuk arta brana, duaning sering malaluwasan pinih kidik 6 (enem) sasih, utawi makarya ring swadharmaning sowang-sowang, punika kadadosang nguwot, manut pararem.

Pawos 13

Sane dados wusan ma-krama, kadi ring sor puniki:

1. Sangkaning magingisir genah saking wawidangan Desa Seminyak, kadulurin antuk nunas panugrahan marupa ilikita saking prajuru.
2. kanorayang ngaran ka-wusang antuk Banjare utawi Desane manut tata-cara.
3. Sang sane wusan ma-krama, nenten polih pah-pahan sangkaning deruwen utawi Banjar.

Palet 2 Indik Prajuru

Pawos 14

1. Desa Seminyak ka-emong antuk kelihan desa, ngaran Bandesa Adat.
2. Banjar, ka-emong antuk kelihan Banjar Suka-Duka.
3. Sane dados madeg Kelihan Desa muang Kelihan Banjar Suka-Duka, inggih punika:
 - 3.1. Mawiwit saking Krama ngarep.
 - 3.2. Ngadegang prajuru, maserana antuk pemilihan ngalihan ngelimang warsa sapisan, tur prajurune sane lami dados kapilih malih. Nanging yaning wenten kebayaparan, upami: seda nadak, iwang darma, wenang ngawentenang pemilihan malih, sang Bendesa Adat ngwangunang Mancagra/panitia.
 - 3.3. Maduluran nunas pasupati panugrahan ring Pura Kahyangan tiga ring Desa Adat Seminyak.

Pawos 15

1. Kelihan Desa/ Bandesa Adat, kasanggra antuk:
 - 1.1. Pangliman pinaka wakil.
 - 1.2. Panyarikan pinaka juru surat utawi juru ilikita.
 - 1.3. Patengen pinaka pa-ngemong druwen Desa, ngaran juru raksa.
 - 1.4. Kasinoman pinaka juru arah.
 - 1.5. Kelihan Suka Duka pinaka wakil Bendesa Adat ring suwang-suwang Banjar.

2. Dudonan panyanggra, manut abot-dangan pakaryane, makadi kasinahan pakaryane, magilir manut pa-etangan Banjar sowang-sowang.
3. Sajeroning ngenterang pasukertan ring niskala, Kelihan Desa nginggilang Pamangku Kahyangan Desa.

Pawos 16

1. Darmaning Kelihan Desa utawi Bendesa Adat, luihnya:
 - 1.1. Ngenterang pamargin sadaging Awig- Awig, paswara muang Pararem Desa Adat.
 - 1.2. Nuntun saha ngenterang krama rawuhing krama Desa, ngupadi manut patitis.
 - 1.3. Mawosang kalih niwakang pamutus, marep ring wicara warga Desane.
 - 1.4. Pinaka duta Desa, matemuang bawos wirasa ring sapa sira ugi.
2. Yaning prade prajurune nilar sesana, wenang keni pamidanda nikel ring kaiwangan warga krama biasa, tur wenang kararyang, manut pararem.

Pawos 17

Patias prajuru luihnya:

1. Apah tigaan ring sakaluwirin pikolih sane ka-pah.
2. Pikolih sewosan manut pararem.
3. Luput rerampen miwah papeson.

Pawos 18

Para juru wenang kagentosin riantukan:

1. Sangkaning seda utawi lampus.
2. sangkaning pinunas ngeraga, wit saking rahayu.
3. kanorayang, apan ngiwangin darma.
4. sampun pawanengan, sampun patut ngentosin prajuru, manut pararem ring pasamuan.

Palet: 3 Indik Pasamuan

Pawos 19

1. Pasamuan utawi pasangkepan ring Desa Seminyak, luihnya :
 - 1.1. Pasamuan Desa utawi Banjar nganut panemaya utawi padgata kala.
 - 1.2. Pasamuan Desa nyaberan 6 sasih apisan, utawi padgata kala.
 - 1.3. Pasamuan Tempekan/Banjar ngesasih apisan utawi padgata kala.
 - 1.4. Pasangkepan prajuru kawentenang tigang sasih apisan, utawi padgata kala.
 - 1.5. Pasangkepan sekaa-sekaa, manut wiguna utawi sakabuatang.

2. Pasamuane Desa utawi Banjar, manut dudonan, kadi ring sor:
 - 2.1. Yaning pasamuane padgata kala, patut kadalurin antuk pangarah, salanturnyane kacihnayang antuk suaran kulkul.
 - 2.2. Para kramane sane pacang nedunin ring pasamuane, patut ma-bhusana adat, nistanya maselempot, tur tan kalugra makta gegawan utawi senjata sakaluirnya.
 - 2.3. Sadurunge ngawitin pasamuane, kariyin patut ngastiti Ida Sanghyang Guru Iswara, masarana daksina pejati, apan Ida Dewaning juru pangarawos. Malih cane utawi lekesan katur ring Bhagawan, Panyarikan, sawireh Ida sane nragayang Awig-Awig Tantu Pagelaran.
 - 2.4. Pangawit kamargiang panyacah utawi sesepan, ring wusane nyacah dadosan agung-alit, manut pararem sowang-sowang, wawu ngeraris ngawentenang bebawosan.
 - 2.5. Sane kautamayang pisan pasamuane, prasida ngamolihang pamutus bawos, sagilik-saguluk, wantah punika sane kamanggehang.
3. Prade sadaging pasuarane punika nenten kararemin, prajurune mangda ngilikang bebawos, tur ngwaliang malih ngwentenang pasamuane, mangda prasida kasungkemin. Bilih-bilih taler nenten mresidayang pararem kamanggehang, wenang prajurune nunasang bawos ring Parisada miwah kantor Agama, mawastu daging pasamuane inucap dados wicara ring Desa.

Pawos 20

1. Ring sajeroning pasamuane Desa muang Banjar, patut kasyarang:
 - 1.1. Munjuk lungsuring pakraman makadi ayah-ayah miwah sulur arta brana.
 - 1.2. Prajuru patut ngawe pangrencana usaha sane kapungkur.
 - 1.3. Sahananing wicara saha pamutusna.
2. Sahananing sane kasyarang ring ajeng, patut katitenin saha niwakang olih pasamuane kramane sowang-sowang.
3. Pamutus pasamuane Desa utawi Banjar, sinanggeh pararem, pinaka pamitegep pamargin Awig-Awig puniki.

Pawos 21

1. Pasangkepan prajuru, patut :
 - 1.1. Kawentenang sanistane ngatigang sasih apisan, bilih-bilih dados ngasasih manut wiguna miwah kabuatanya.
 - 1.2. Kamiletin ngaran kasarengin antuk sahananing prajuru Desa, lan Kelihan Suka-Duka.
2. Pasangkepan prajuru, kawenangane wantah ngarincikang tata upaya ngmargiang usaha pangrencana sakaluire.
3. Pamutus sahananing rencana, napi malih rencana pacang niwakang tategenan ring krama, tan kepatutang, sadurunge kapikwukuhina antuk pasamuane Desa utawi Banjar, manut dudonan.
4. Pamutus pasangkepan prajuru, mawiwit saking Sang Amawa Rat, utawi ngonekang pecak pararem kramane, sane kasinangguh paswaran Desa.

Pawos 22

1. Pasangkepan Sekaa-sekaa, kawentenang manut wiguna.
2. Sakaluirin sangkepan paseka-sekaan, patut matur supeksa dumun ring prajuru Desa muang Banjar, mangda sampunang lempas ring patitise sane munggah ring pawos ring ajeng.

Palet 4 Indik Kulkul

Pawos 23

1. Kulkul ring Desa Adat Seminyak wenten tigang soroh, luihnya:
 - 1.1. Kulkul Desa, magenah ring Pura Desa.
 - 1.2. Kulkul Banjar Suka-duka, magenah ring sowang- sowang banjar.
 - 1.3. Kulkul sekaa, magenah manut wiguna.
2. Suaran kulkul puniki kabawos suaran Iswara Desa, ngaran Iwa Desa wiadin Krama Banjar.
3. Tabuh muang tatepakan kulkul inucap, sinah mabinayan manut tatujon:
 - 3.1. Tengeran kulkul nedunin ayah utawi pasamuan, biasa 1 tulud.
 - 3.2. Tengeran puja-wali, nungtit banban-alon, ngawit saking pujastawan Jro Mangku napi malih sang wiku.
4. Tengeran ka-panca-baya, luihnya:
 - 4.1. Ageni bhaya utawi umah puwun, kagesengan, suaran kulkul atulud bulus.
 - 4.2. Katoya- bhaya utawi belabar agung, gentuh, suaran kulkul atulud bulus.
 - 4.3. Bayu- bhaya utawi angin ribut, awus blembong, suaran kulkul atulud bulus.
 - 4.4. Jiwa- bhaya utawi kemalingan, karampok, kabegal, suaran kulkul duang tulud bulus.
 - 4.5. Maha- bhaya utawi anak ngamuk, anak masiat, gumi berindeng, perang agung, suaran kulkul bulus titir paling kidik tigang tulud.
 - 4.6. Yaning wenten sinalih tunggil warga Desa miwah Banjar lampus, cihnanya wenang nyuarayang kulkul kalih tulud banban.

Pawos 24

1. Kulkul Desa muang Banjar nenten dados katepak, yan tan sangkaning pituduh Prajuru, sajawaning tengeran ka-panca-baya.
2. Sang purun kulkul tan sangkaning pituduh, patut di gelis matur supeksa maka buatan panepake, yaning tan sapunika, wenang kadanda manut pararem, sapunika taler pamidandane yaning nenten nganutin wiguna.
3. Sahananing kulkul ring sawewidangan Desa Adat Seminyak, patut katepak, prade wenten kulkul banjar nengerang suara ka-panca-baya. Yaning mamurug, Banjar inucap keni danda ageng arta mawilang 1000, wijinan jinah bolong.
4. Tengeran ka-panca-baya, patut ka tedunin olih sahananing ayahan, saha sregep makta gegawan, nganutang ring sarupaning bayane. Yan mamurug, keni danda manut pararem.

5. Kulkul pa-sekaa-sekaan, tan wenang nyawurin sukat miwah tengeran kulkul Desa miwah Banjar, prade kapurug, keni danda manut pararem.

Palet 5 **Indik Druwen Desa**

Pawos 25

Druwen Desa Seminyak, sekadi mungguh ring sor puniki:

1. Kahyangan Desa makadi Kahyangan Tiga, Pura Panataran, Pura Desa/Bale Agung, Pura Puseh, Pura Dalem Kahyangan ngaran Pangulun Setra.
2. Setra wenten kalih palebahan, luihnya:
 - 2.1. Setra Adat Seminyak, genah nyane ring sisi kidul.
 - 2.2. Setra anak sungkan kanorayang, ngaran sakit ila, magenah ring sisin segara/pakung mati.
3. Tanah bukti/palaba Pura marupa tanah tegalan kwehnya:
 - 3.1. Pelaba Pura Dalem Penataran : 7475 m2 Sertifikat SHM No. 259
 - 3.2. Pelaba Pura Desa : 1935 m2 Sertifikat SHM No. 307
 - 3.3. Pelaba Pura Prajapati Pangkung Mati : 3000 m2 Sertifikat SHM No. 5604
4. Piranti-piranti Desa, luihnya:
 - 4.1. Wewangunan Kahyangan Desa.
 - 4.2. Bale Banjar Saha Bale kulkul ring sowang-sowang Banjar.
 - 4.3. Margi druwen Desa sane ka-empon tur kapiara olih Banjar, manut dresta.
5. Lelanguan makadi tetabuhan miwah ilen-ilen sakaluire:
 - 5.1. Pacanangan lan petapakan barong jangkep sungungan Desa.
 - 5.2. Kulkul ring Pura Desa miwah kulkul ring sowang-sowang Banjar.
 - 5.3. Ilen-ilen wali, makadi Rejang pependetan.
 - 5.4. Gambelan Gong kadruwen antuk desa, kapiara antuk sekaa gong.

Pawos 26

1. Prajuru patut ngetangang druwen Desa, yaning sampun kaanggen wewangunan utawi pangaci Kahyangan Tiga ring Desa Seminyak.
2. Nyabran Pasamuan Desa muang Banjar, Patengen patut nyiarang sapamargin druwen Desa ring krama, maduluran ilikita sane pasti.
3. Sakaluirin druwen Desa miwah Banjar, patut wenten ilikitanipun, ngaran surat-surat.

Palet 6
Indik Pamitegep

Kaping 1
Karang Tegal Lan Carik

Pawos 27

Indik Pawatesan

1. Karang ring sowang-sowang krama desa, wates sane pinih kaler muang kangin, patut kakaryanin olih sang nruwenang punika, ika ngaran magaleng kaluanan/kahulu.
2. Yaning tegal miwah carik, sang madruwe patut mamiara wates, sisi kelod miwah kawuh, ika ngaran megaleng ke-tebenan.
3. Yaning prade kerasayang wenten wates sane ngelikadin, yaning pada arsa, penyanding ngengkengin nganggen pal saking kantor Agraria/Pemerintah.
4. Yaning wenten karang kabengbeng, prajuru sami patut ngutsahayang mangda wenten margi wiadin wakan, panes Desane yaning ana karang kabengbeng.

Pawos 28

1. Sinalih tunggil krama Desa muang Banjar, nenten dados:
 - 1.1. Ngalah-alah margi, karang, carik miwah bangket.
 - 1.2. Ngalah-alah tanah linggih suci, sekadi Kahyangan, muang setra.
2. Prade wenten sekadi ring ajeng, sang ngalah-alah patut ngewaliang tanahe punika tur sang ngalah-alah keni danda manut pararem, maduluran upakara pacaruan ring genah tanah sucine sane ka-alahang.

Kaping 2
Papayonan

Pawos 29

1. Ngawitin nandur papayonan tanem-tuwuh, patut majebar adepan agung, ngajerowang saking wates, yan ngliwat wenang ka-sepat gantungin.
2. Prade wenten tatanduran ngungkulin pisaga, menawi tauning mayanin, sang kaungkulan patut ngwarah, majalaran paiguman sane becik, mangda sang nrwenang tarune ledang ngrebah utawi notor.
3. Yaning sampun kawarah, taler tan kapidung olih sang nrwenang dados sang rumasa katetahan nyadokang ring prajuru Desa muang Banjar.
4. Sang prajuru maritatasang, miwah niwakang pamutus:
 - 4.1. Ngrebah taru sane mayanin tur kakenyang prabeya ngrebah tarune ring sang rumaksa, manut logika.
 - 4.2. Prade jantos ngrubuhin, napi malih sampun polih kawarah, sang madruwe patut keni danda manut pararem, ngaryanang upakara durmangala.
 - 4.3. Sapunika taler sang lumaksana mamunggul wiadin notor, jantos ngrubuhin wewangunan anak liyanan, wenang taler kenyang danda manut pararem.

Kaping 3 Wewangunan

Pawos 30

1. Asing-asing wewangunan, patut :
 - 1.1. Masadok ring prajuru, mangda wewangunan inucap nenten ngliwatin wates.
 - 1.2. Ngangge gagulak asta kosala-kosali miwah asta bhumi, nistanya manut ring patitis niskala.
 - 1.3. Nenten nyayubin utawi ngungkulin wewangunan utawi karang sang sane tiosan.
2. Prade wewangunane jantos nyayubin, napi malih temboke ring telenging wates, ring sampune kawarah tur kasadokang ring prajuru, saha sampun kapari tatasang, wenang keni pamidanda manut pararem, saha tembok punika wenang kagubar, utawi sanistanya mangda kakaryanang abangan sepatutnyane, sadereng nembok nyandang ngawentenang paiguman riyin sang penyanding.

Kaping 4 Wewalungan

Pawos 31

1. Sahananing warga Desa sane miara sakaluirin wewalungan, patut pada siaga nitenin negul, ngalogor, mangdaninin nenten ngerusakin karang, utawi paabianan krama siosan, bilih-bilih jantos ngeranjing ngaletihin karang suci.
2. Yaning wenten wewalungan lumbar wiadin ngleb, jantos ngrusakin pakarangan paabianan, ring sampune kawarah, kengin raris kataban, tur kadanda manut pararem, saha ngwaliang wiwit, ngaran bibit, muang nawur panebas panabanan manut logikan sang prajuru.
3. Yaning prade jantos ngletihin karang suci, ring sampune poilh kaparitatasang olih prajurune, wenang sang nruwenang wewalungan keni danda manut pararem, saha ngaturang upakara pangrebuan antuk byakawonan, prayascita muang sesayut durmangala.

Kaping 5 Bhaya

Pawos 32

1. Indik baya sane kaucap panca-baya,luirnya:
 - 1.1. Geni baya utawi kagesengan, umah puwun.
 - 1.2. Toya-baya utawi kabelabaran, anyudang embah.
 - 1.3. Bayu-baya utawi angin ribut, angin blembong.
 - 1.4. Jiwa-baya utawi maling, ngrampas, ngarampok, mamegal.
 - 1.5. Maha-baya utawi siyat, gumi berindeng, perang agung.
2. Sang katibenan panca-baya, wenang nepak kulkul manut pawos 23 angka 4 mangda gelis polih pitulungan, tur sang mayanin keni beya patiba janpi ngaran, baya ubad, saha mrayascitanin, myakawonin, ngulapin, ring genahe katiban baya ika.

3. Yaning prade katempuh dening jiwa baya, patut ngedig kulkul manut pawos 23 angka 4, utawi sang kemalingan, karampok muang selatur ipun nguningang ring prajuru, sane patut nimbangin muang niwakang pamutus ring dustane, luire:
 - 3.1. Sajawaning nunasang ring polisi, taler mangdane manut ring Undang-Undang saha ngwaliang wiwit.
 - 3.2. Yan prade wenten dusta utawi maling lintangan ring apisan tur sampun naenang kadanda, wenang keneng pidanda nikel.
 - 3.3. Maweweh ngaturang panyepuhan utawi panyapuh, yan prade ngmaling druwen Dewa Bhatara, ngaturang suci agung – alit manut logika.
 - 3.4. Yaning Prade katempuh dening blabar agung, kagentuhan, angin blembong, patut ngedig kulkul manut pawos 23 angka 4, sahananing para ayahan patut nedunin, saha makta gegawan manut sarupaning Baya.
 - 3.5. Prade wenten silih sinunggil krama keni kagesengan, warga kramane patut mapitulung ngaryanang pakubon, utawi rarompok tetanceban.
 - 3.6. Yaning wenten anak ngamuk, anak masyat, perang agung, wenang nyuarayang kulkul bulus titir, tur wenang kesawurin olih krama Desa tetanggane, nanging tan dados ngliwat ring Desane liyanan mangda nenten paindikane samuh, saru, ngawenang wiadin syate ngedenang tur indike tan pastika.

Kaping 6 Panyanggran Banjar

Pawos 33

Krama Desa rikalaning ngawentenang karya, polih penyanggran utawi karombo antuk Banjar utawi pengampok, ring sowang pabanjaran, patut:

1. Rikala ngwangunang Pitra yadnya, utawi Manusa yadnya, manut pinunas Sang madruwe karya utawi sang mayadnya.
2. Banjar pangampok, rikala matulung ring sang kaduhkitan, ngwangunang karya pitra yadnya sane nista, tan polih pasanguan.
3. Yaning prade wenten pangu ring pangrombo, punika wantah sangkaning pinunas sang madruwe karya, wantah apisan jantos puput karyane.

SARGA IV SUKERTA TATA AGAMA

Palet 1 Indik Dewa Yadnya

Pawos 34

1. Indik Agama Hindu, kasukerta patut:
 - 1.1. Dados nilar Agama, nanging mangda sangkaning becik, sakewala sang matilar nenten dados ngedum warisan utawi tan polih warisan.
 - 1.2. Nenten dados ngiming- iming, ngajak-ajakin anak sampun ma-Agama mangda ma-Agama malih, dusta Agama ngaranika.
 - 1.3. Yan wenten anak sewosan Agama misadia pacang ngranjing Ma-Agama Hindu, patut prajurune sami ngmargiang panetes, yaning sampun sangkaning nekeng hati, galang-apadang, patut sang ngranjing Ma-Agama Hindu punika nglaksanayang Yajnya masudi wadani, kasaksinin antuk Prajurune sami, parisuda ika utawi sah.

- 1.4. Yaning wenten anak me-Agama tiyosan ring Hindu, lumaksana pariceda ngnistayang Agama Hindu, utawi sakaluirin tingkahe sane ngnistayang sampunang jeg malaksana parikosa, banggras, muang nimpalin. Becik aturang ring sang mawang rat, mangda sang ngawiwenang mawosin.
2. Luir Kahyangan sane wenten ring Desa Adat Seminyak:
 - 2.1. Kahyangan Tiga sekadi Pura Puseh, Pura Dalem Kahyangan, muang Pura Desa/Bale Agung.
 - 2.2. Pura Dalem Panataran.
 - 2.3. Pura ring sowang-sowang pa-Banjaran, pinaka stan an Ida Bhagawan Panyarikan.
3. Rahina piodalan ring sowang-sowang Pura, kadi ring sor:
 - 3.1. Ring Pura Desa/Bale Agung ring dina Soma Kliwon wuku Kuningan.
 - 3.2. Ring Pura Puseh, rikala Anggara Kliwon wuku Tambir.
 - 3.3. Ring Pura Dalem Panataran, ring dina Buda Umanis wuku Tambir.
 - 3.4. Ring Pura Dalem Kahyangan utawi panghulun setra, rikala Buda Umanis wuku Perangbakt.
4. Pengaci sane kamargiang marupa: nista, madia, utama, manut kojaring Sastra Agama kadulurin antuk pararem ring panglaksanane.
5. Pangempon ring sowang-sowang Pura punika, manut dresta Kahyangan Desa:
 - 5.1. Pura Desa/Bale Agung ka-empon antuk Tempekan Kangin.
 - 5.2. Ring Pura Puseh, ka-empon antuk Tempekan Kaler.
 - 5.3. Pura Dalem Panataran, ka-empon antuk Tempekan Kelod.
 - 5.4. Pura Dalem Kahyangan panghulun setra, ka-empon antuk Tempekan Kubu Tagtag.
 - 5.5. Ratu Ayu Gede, ka-empon antuk Desane ring Seminyak.
6. Pura ring sowang-sowang Pabanjaran, ka-empon antuk Banjar sowang sowang.

Pawos 35

1. Ring sowang-sowang Pura Kahyangan Tiga ring ajeng, kawentenang pamangku.
2. Yaning pacang ngadegang pamangku, tata dudonan, patut:
 - 2.1. Nyanjan utawi mapinunas ring Ida Bhatara.
 - 2.2. Ngwilang saking turunan, utawi ngwaris.
 - 2.3. Prade maka kalih ring ajeng tan kadagingin, durusang ngwentenang pilihan antuk prajuru utawi krama Desa sami.
3. Sane tan dados adegang pamangku, luirnya:
 - 3.1. Ceda angga/cacad, raganya belang-poleng, sengkok bidung, buta bongol, bega kolok, sungkan buduh, sungkan ila.
 - 3.2. Ulah cacad luire: ngrabinin wong arabi, mamitra miwah saka luire.
 - 3.3. Tan polih pararem ring krama Desane.
4. Prabeya ka-pamangkuan :
 - 4.1. Prabeya madiksa widi utawi mawiten, kategen olih sang ngadegang, makadi Krama Desa utawi pangempon Pura sowang-sowang.
 - 4.2. Riwekasan yan seda, prabeya upakara patiya-tiwan ya patut kasungkemin antuk sang ngadegang.
 - 4.3. Pamangku sane sampun madiksa widi, rikala seda tan dados pendem, wenang kaabenang, nistanya mekingsan di geni.

Pawos 36

Swa-dharmaning pamangku, luihnya:

1. Ngenterang upacara piodalan ring Kahyangan, utawi ring sowang-sowang pakubon krama Desa, muang ngaturang panawuran ngaran nedunang ring sowang-sowang krama desa.
2. Sang mapanawuran patut matur ring prajuru, mangda sida rahayu, nyandang kasuratang tur kaunggahang dados druwen desa, luihnya:
 - 2.1. Panawuran upakara muang upacara kasarengin antuk wewalen.
 - 2.2. Panawuran laluwes muang mole-mole.
 - 2.3. Sesari sane langkungan ring Rp 500, jinah bolong wijinan.
3. Pamangku Kahyangan Desa kawenangan:
 - 3.1. Nibakang panugrahan ring pamangku sanak muang krama Desa manut pararem.
 - 3.2. Polih panampa rikalaning ngmargiang puja wali, saking mangku Kahyangan sewosan, warga dane mangku miwah mangku sanak.
 - 3.3. Polih panyepuhan, prade kapiwalin antuk silih sinunggil kramane, nanging mangda mabukti manut Tri Pramana kaiwangnya, patut sang Pamangku nyepuhin raga.
 - 3.4. Prade pamangkune polih empeh utawi pawuwus, wenang kasadokang ring Prajuru.

Pawos 37

1. Rikalaning patut nemonin piodalan, tur sampun ngmargiang pangalang sasih utawi galah ngawit nyengker dewasa, pet prade wenten silih sinunggil pamangku, utawi warga dane mangku katiben cuntaka lampus, upakara piodalan lan punika patut kalanturang olih pamangku Desa Iyanan, sane nenten keni kapiambeng. Yan prade nenten purun, patut nuwur Sang sulinggih mangdane muputang yadnya punika. Mangkune sewosan pinaka panampa panugrahan Sang Sulinggih.
2. Pamucuk karyane ring Khayangan, ka-ampok antuk Kramane ring pabanjaran manut dresta.
3. Krama Banjar sane sewosanring pangampok, patut ngardinin gebogan utawi prani, ngaturang bakti ka Pura sareng sowang-sowang krama Banjar inucap, tegap makta sarana pabaktian miwah sekar jangkep pacang anggen muspa.
4. Semalih rikala ngmargiang pa-ngaci aci Dewa, nenten pisan kapatutang ngwentenang pajajuden ring sawewidangan Desane ring Seminyak, sane marupa bobot ring toh utawi babotoh, sane matatujon ngmolihang arta-brana.

Pawos 38

Patiyas utawi pikolih pamangku, nihan luihnya:

1. Apah tiga, saking sesari ring Desa.
2. Pamupon bhakti sangkaning di-naksinan nyabran sasih manut pararem Desa.
3. Laluputan utawi nenten kakenyang tategenan manut pawos 9.
4. Patiyas sane siosan manut pararem.

Pawos 39

1. pamangku wenang kagentosin, riantukan:
 - 1.1. Sangkaning seda/lampus.
 - 1.2. Lara tahunan, tan prasida waras.
 - 1.3. Pinunas ngraga, apan rumasa nenten sanggup.
 - 1.4. Sangkaning krama Desane ngraryang, apan sinangguh iwang ring darma.
2. Yaning prade pamangku jantos kararyang sangkaning mabukti iwang lempas ring darma, nglaksanayang Asta Dusta, wenang kadanda manut pararem Desa, saha ngawaliang prabeyane nguni duk kawintenang. Iki pawilangan Asta dusta:
 - 2.1. Mamobab utawi mogbog.
 - 2.2. Mamekel utawi ngadu daya nora patut.
 - 2.3. Mamirat utawi nyilih tan ngulihang, tan satia ring janji.
 - 2.4. Mamaling utawi ngamet druwen anak len tan pesadu.
 - 2.5. Ngrampok maimbuh marikosa, ngmatiang.
 - 2.6. Nyetik miwah ngeracun.
 - 2.7. Manesti, maneluh, naranjana.
 - 2.8. Mamitra ngalang.

Pawos 40

Indik Sebel- Kandel, Pamangku tan wenang lumaksana:

1. Cro utawi letih.
2. Mamunyah
3. Mamadat.
4. Mamitra ngalang
5. Mamandung utawi mamaling.
6. Ngalap rabi malih.
7. Masumpah muang nayub cor

PAMIDARTA: Yadian sampun munggah sekadi ring ajeng, luihnya pamangku, tan dados ngamet rabi malih, nanging yaning kantun jejak utawi bajang, tuna-lwih yusanya 45 jantos 60 tahun, tur kantun semaranya jenang, wenang pwa ya ngamet rabi malih, nanging anutakena ring tata-krama iki:

1. Mangda ingkup dumun ring sajeroning kulawarga kotamanya ring putra-putri sane sampun munggah kanya – jejak, sane sampun uning ring tatimbang wirasa.
2. Nunas patimbangan ring prajuru desane sami, mangda patut antuka sang prajuru niwakang pamargi.
3. Nenten kadadosang ngambil anak sapihan, yaning polih mangda sane kantun Marupa/mawasta bajang, nistanya balu sane nenten sakaning nyapihan, nanging witning kekalahin pejah de suaminya utawi istrinya, kantun suci ngaranya ikang prakretti.
4. Sampun jangkep pawirasan, rarisang nangkil ka Purane ring genahnya ngmanguin, masarana banten :daksina ageng 1, suci asoroh, rantasan putih saperadeg, raris aturang tegak-linggih ka-pamangkuan. Puput atur tunasang ragane Tirta pakuluh panglebar gelung utawi pusungan.

5. Wawu kengin dados ma- Pabuncingan utawi masakapan, tugtug: 3-5-7-9-11, jantos pinih panelelas 42 dina, patut malih sang kalihan mawinten widhi, mangda dados malih ngemban Dewa utawi amangku widhi utawi ngamangkunin.
6. Sane kawenang lumaksana diksa widhi, sira mangku sane kapucukang utawi mangku Gede, utawi pamangku sane yusanya lingsiran, napi malih mresidayang nuwur sang wiku, pinih becik.

Pawos 41

Kasukertaning Kahyangan

1. Sane tan dados ngranjing ka Pura, luihnya:
 - 1.1. Cuntaka sangkaning sebel ring raga, utawi kelampusan manut senger.
 - 1.2. Makta barang sakalwire sane kasinengguh leteh utawi ngeletehin.
 - 1.3. Wang lara buduh, wang keneng lara tan wenang sambat, ngaran sakit ila.
 - 1.4. Sato agung, sajawaning anggen upacara ma-papada.
 - 1.5. Mabhusana tan manut tata cara ngranjing ka Pura.
 - 1.6. Sadereng kalugra utawi pituduh saking prajuru.
2. Tata tingkah sane tan kawenangan ring Pura, luihnya:
 - 2.1. Masumpah, ngaran nayub cor.
 - 2.2. Makobetan utawi mawiadi/mayegan, nemah- misuhin.
 - 2.3. Menahin wastra, pusungan, mabacin, mawarih.
 - 2.4. Sirep lanang-istri utawi matemtu sanggama.

Yan mamurug kojaring ajeng keni danda manut pararem.
3. Prade wenten anak karawuhan ring Pura, wenang pintonin, caranya; lambet antuk carang kelor, carang dapdap, utawi tunjel antuk dupa 66 katih, yaning tan maaduhan tan maciri puwun tan matampak balan, jati Dewa Bhatara ya turun, wenang gugonin. Nanging yaning macihna: maaduhan, balan, puwun, dudu Dewa Bhatara sane turun, pastika wang ika ngawi-awi, utawi karangsukan dening Bhuta-kala, ngletehin Dewa ngaranya, tan sipi cacadnya, wenang keneng danda manut pararem.

Palet 2 Indik Resi Yadnya

Pawos 42

1. Sang pacang ma-podgala/madwijati, sejawaning nunas panugrahan ring sang rumawos utawi P A R I S A D A HINDU DHARMA muang Dinas Agama, taler prajurune patut mangda uning.
2. Prajuru Desa taler patut sareng nureksanin, nitenin, mangda sulur sang di-niksan jati-jati manut ring kecaping Sanghyang Agama, tan cedangga, muang sakaluirin ceda sewosan, prajuru Desa sane uning. Subagia mulus pamargine sang wiku inucap sinanggeh guru Desa/Guru jagat, Bhatara sekala, awinan sadurunge, becikang pisan nureksain.
3. Taler prajuru Desane patut uning ring gelar muang swadesan Ida sang guru Nabe/sasuwaran, miwah guru waktranya/guru pengaji (ngajahin).
4. Sapunika taler prajuru patut di gelis nyuarang parab utawi gelar ang diniksan manut ring sane sampun kaputusan olih kantor dinas Agama muang paican Nabe, sane mawasta surat pecatu.

Pawos 43

1. Sejabaning pamangku, sapasira ugi warga Desane ring Seminyak, mapekahyun pacang mewinten wiguna, maka buatan pacang mamargi: Nyontengin, malianin, nukangin, muang selantur ipun sarupaning panganter yadnya, patut mesadok ring prajuru Desa muang Banjar.
2. Asing- asing warga sane pacang nglaksanayang winten wiguna, prajurune wenang maritatasin, nitenin. Yaning menawi wenten sane nyasar utawi lempas ring kecaping Agama wiadin matungkas ring drestaning desa kramane, prajuru wenang ngwalangin.

Nanging yaning sampun manut, prajurune patut nyaksinin upacara yadnyane punika, tur ngraris maweh patitis, amunapi kawenange dados mamargi, iki pawatesnya;

1. Eka jati/pamangku, wenang muputang yadnya saking pinih alit jantos rawuh ring sorohan suci.
2. Saking eka sata, panca sata, panca korsika.
3. Yan sang dwijati/sang wiku, saking pula gembal muang bebangkit jantos ngamunggah sasi. Samangkana pitiwasira sanghyang Ghana pati, sang rumaga panyarikan Dewa, ring mataki- taki nglaksanayang yadnya.
4. Indik caru, saking Manca klud jantos mawalik sumpah, kawenangannya kapuputang olih Jro Gede senggu, sawireh De Senggu kaicen kotamaning puja caru, olih Danghyang Dwijendra nguni.
5. Sang wiku tan wenang muputan caru kemawon, yaning kapucukin antuk: piodalan, mlaspas mapadagingan, karya mamungkah. Yaning mamurug, kasupat sira sang wiku denira sanghyang Ghana pati, lwir Bremara ngisep bacin padanya/tamulilingan ngisep tahi.

Pawos 44

1. Krama Desa utawi Banjar, katuntun olih prajuru patut nyarengin ngawas, pamargin yadnyane, tur ka-icen pamatut olih sang pandita utawi pinandhita/dalang, Balian, muang selanturipun, manut kawenangia sowang-sowang.
2. Prajuru patut dados manggala ring Desa muang Banjar, makwukuhin linggih sang para wiku, miwah para pinanditane ring Desa Seminyak.
3. Ngaturang punya ring Ida sang muput karya yadnya, manut ring nista, madia, muang uttamaning karya yadnyane.
4. nelebang, miresepang, pengajah, pawisik, pustaka suci pakaryan Ida para leluhur, para Resi muang wiku, sane kaanggen pariagem utawi gegambelan, luirnya:
 - 4.1. Balian sonteng pariagemnya : Atur seha sasontengan.
 - 4.2. Balian usada pariagemnya : lontar pangusadan.
 - 4.3. Balian taksu pariagemnya: nyungsung druwen Dewa
 - 4.4. Sangging muang undagi pariagemnya: Atur seha, rontal kul putih, pakaryan sang kul putih muang Kusuma Dewa pakaryan Sang Empu Kuturan.

PAMIDARTA: Sane mawasta Balian taksu inggih punika, Balian sane tan magagelaran sastra usada. Sane aeanggen wantah paican Ida Bhatara, upami: polih nyambut ring sajeroning karang suci marupa manik, soca, kris, muang sane lyanan, ika ngaran Balian Taksu. Nanging yan ring luar karang suci polih nyambut, upami: jurang, pangkung, tukad, alas, grembengan, setra, Balian engengan ngaranika ayuwa ngugonin, uning nyengkalanin.

Palet 3 Indik Pitra Yadnya

Pawos 45

Pamargin Pitra Yadnya manut sekadi ring sor puniki:

1. Kawenangan mendem utawi makingsan di geni/mageseng, kadulurin antuk bya tanem muang tirta pangentas tanem. Pamuput upakarnya rawuh ring pangerorasan ngaran makakelud.
2. Matiwa –tiwa utawi upakaraning pangabenan, manut nista, madia, utama, tur sane kengin ka abenang, pinih alit yusane mangda sampun maketus untu, pamuput pangabenane rawuh ring panyekah bwukuran, nganyut sekahe kasegara, raris tuntun Dewane lanturang nyegara gunung. Rawuh saking nyegara gunung, rarisang unggahang Dewane ring kamulan, ika ngaran mapegat sari, yening nenten mresidayang nyekah bwukur, wenang anjekang rawuh ring sekah kangsen, sampun sang atma meraga Dewa pitara, wenang malinggih ring pelangkiran. Yaning durung maketus, ngawit saking yusa 3 sasih/asambutan wenang puputang antuk upakara panglungahan. Nanging yaning soran ring 3 sasih/asambutan, tan dados inupakaran, apan kantun pawakan Toya, kewala bekelin kawangen raris pendem, tan nyuarayang kulkul, krama Desa muang Banjar tan nyuarayang kulkul, krama Desa muang Banjar tan keneng cuntaka, kewala yayahrenanya kene sebelan sawulan pitung rahina, sebelan Ari-ari ngaranya.

Pawos 46

Darma muang tategenan yaning prade wenten warga kramane lampus :

1. Sang kaduhkitan patut :
 - 1.1. Nyandokang ring kelihan suka-duka, tur nunasang tatimbangan ring kawentanya.
 - 1.2. Nganturin krama Banjare ngerombo, makarya saluirin eteh-ete sawa.
2. Darmaning Desa muang Banjar.
 - 2.1. prajuru maritatasang muang mamutusiasang pamargin sang kaduhkitan manut dresta, pacang kapendem napike ke- abenang.
 - 2.2. Nepak kulkul manut pawos 23 angka 4-4.6. ring ajeng
3. panyanggran Banjar salanturnya:
 - 3.1. Sowang- sowang krama nedunang patus manut pararem ring sowang-sowang Banjaran, sapunika taler yan prade nglantur ka-abenang.
 - 3.2. Krama Banjar lanang- istri ngambil karya manut dresta, saha ngrombo rikala kakirangan. Warga kramane patut mabhusana adat, sanistanya nyalempot utawi masasenteng.
 - 3.3. Pamargin sawa miwah upakarane, mangda dabdab, alon,antar.
4. Tan kengin ngalelet langkungan ring a-wuku/ pitung dina, tur polih pagebagan manut pa-etangan kelihan Suka-Duka, yaning prade wanenge kapurug, wenang kadanda antuk upakara banten, ngaturang pa-mrayascita ring Kahyangan Tiga.

Pawos 47

1. Saparindikan, dados tan dados mendem sawa, kadi ring sor:
 - 1.1. Tan kengin mendem sawa manut dewasa: kajeng kliwon, buda kliwon, Saniscara kliwon, saniscara watu gunung, sandung watangan.
 - 1.2. Tan dados makirim wangke/makajang bangke, nglangkar watangan.
 - 1.3. Rikala piodalan, lan papahaman ring Kahyangan Desa utawi panyejeran Ida Bhatara.
2. Nganutang genah papendeman, inggih punika:
 - 2.1. Ring setra rare, genah pamendeman sawa rare sane durung ketus untu.
 - 2.2. Sajawaning punika, kapendem ring genah setra Ageng.
3. Kalugrayang menem sawa, manut pa- etangan:
 - 3.1. Anak alit sane durung tumbuh untu, patut kapendem pramangkin, tan ngetang dewasa malih.
 - 3.2. Rikala wenten piodalan, prade wenten anak lampus, nenten dados nyuarayang kulkul, patut gelisang pendem ka-setrane, tur pamargine cara mamandung. Krama Banjare nenten dados nyarengin, mamargi ka setrane galah wengi, tan paswara, tan pa-upakara, pramangkin, tan wenang inepang, pendem makingsan ngaranya.
 - 3.3. Sane wenang ngrombo tur sareng keni sebelan, wantah: panumbak miwah pangapit.
4. Ring setra tan kawenangan makarya undung- undung/ gagumuk kuburan, sakewala kengin papinget asiku bah- bangun.
5. Prade wenten krama sewosan mendem sawa ring setran Seminyak, wenang keni panwukun setra, gung arta jinah bolong wijinan, saha upakara sejangkepnya, manut pararem.

Pawos 48

1. Yaning wenten anak lampus sangkaning salah pati, lan kapungawan, kalugrayang makta budal, tur kaprateka sapatutnya, ring sampune kadulrin antuk panebusan muang pangulapan.
2. Yan prade wenten sinalih tunggil krama ngerobang warga keni gering Agung/ha, gering tan wenang sambat, patut digelis sadokang ring prajuru, miwah tiba-jampiyang ring usada ngaran Dokter. Prade mamurug, sang ngerobang keni danda manut pararem, saha ri-kalaning kapatianya tan polih pangromban muang suaran kulkul.
3. Yaning wenten anak istri lampus kanton ngadut manik, tan dados pendem, sadereng bobotane embas.

Pawos 49

1. Munggwing kojaraning kacuntakaan, kadi ring sor:
 - 1.1. Sebel Bebanjaran laminnyane tigang dina.
 - 1.2. Yan prade kapendem utawi ngaben pramangkin kaetang sebele ngawit saking lampus, ngantos tigang dina saking pakutangan, puput sebele sampun lebar/ buntas.

- 1.3. Salwirin patiya-tiwan sane merupa ngawangun/ngawangunang Pitra sane sampun mapendem utawi makingsan digeni, yadian marupa niri wiadin ngerit/ngaben ngegalung, pawilangan sebelnya ngawit saking ngulapin, ngantos tigang dina saking pakutangan, puput sebele sampun lebar/buntas.
2. Sang madruwe layon :
 - 2.1. Rare pejah durung kepus udel keneng cuntaka sawulan pitung dina.
 - 2.2. Saking kepus udel ngunggahang, keneng cuntaka masuwe roras rahina.
 - 2.3. Saking sulur kakilitan pakulawargan keni cuntaka roras rahina.
3. Sane tan keneng cuntaka luwirne:
 - 3.1. Sang sulinggih, lan pamangku Kahyangan Tiga.
 - 3.2. Krama Desa sane nyanggra karya rikala ngwangun yadnya ring Kahyangan Desa, ring sampune galah puput ma-Yadnya, Krama Desa dados ngerombo karya sane keni kacuntakan.

Pawos 50

Atiwa- tiwa, ngaran pangabenan, wenten kalih soroh pamargine, luwirne:

1. Nyawa Resi utawi nywasta Geni kamargiang saantukan galihe tan kakenyang utawi tan ngagah.
2. Nyawa preteka kamargiang antuk ngagah utawi mreteka sawa bah-bangun.

PAMIDARTA: Nyawa Resi maserana antuk awak-awakan cendana wiadin maja gahu, apan tan ngagah tulang. Nyawa pretaka/sawa bah-bangun utawi ngagah galih ring setrane raris ka-preteka.

3. Dudonan Pangabenan ring sor:
 - 3.1. Ngaskara antuk ngagah galihe, utawi Nyawa Resi.
 - 3.2. Pangutangan antuk ngeseng sawa.
 - 3.3. Pakiriman.
 - 3.4. Pangrوران, nyekah ngangsen, nyekah mamukur.

PAMIDARTA: Yaning sawane matanem utawi makingsan di Geni, pamuputnya rawuh ring pangrوران. Yaning ngaben, manista, madia, utama, pamuputnya rawuh ring nyekah bukur, raris ngunggahang. Nistanya rawuh ring nyekah ngangsen, mangda mrasidayang sang Dewa pitarane malinggih ring plangkiran.

Pawos 51

1. panemaya pangabenan, nyekah utawi ngerit, kamargiang olih Desa Adat ring Seminyak, sanistanya ngalimang warsa sapisan manut pararem.
2. Tata-sulur pangabenan, manut kadi ring ajeng, maweweh malih kadi pararem pamangku Kahyangan Desa, luirnya:
 - 2.1. Bhaya panwukun setra, katur ke Dalem Kahyangan manut dresta miwah Pararem.
 - 2.2. Nunas tirta ring Kahyangan Tiga, masesari manut pararem.

Palet 4

Indik Manusa Yadnya

Pawos 52

1. Manusa yadnya, inggih punika upakara sane nganutin darmaning kamanusan, ngawit saking patemon kama petak lawan kama bang sajeroning garbha, sane mawasta patemon arda naresuari, dados kama dadu/cucupu Manik, jantos medal putra, ngaran rare.
2. Dudonan upakaranya.
 - 2.1. Mayusa bobotane asasih jantos tigang sasih, ngaran ma- Gedonggedongan.
 - 2.2. Duk rarene wawu mijil, nanem ari-ari, ngadegang sanggar tuntunan.
 - 2.3. Kepus udel, upakara mapag rare, apan ikuhnya sampun putus.
 - 2.4. Mayusa roras rahina/panglepas awon.
 - 2.5. Mayusa awulan pitung rahina/akambuhan.
 - 2.6. Tugtug tigang sasih/asambutan, patut memargi yadnya: Mapetik, Matelu bulanan, nistanya Nyambutin.
 - 2.7. Tutug enem sasih mawasta: Awetuan, ngawitin maweton.
 - 2.8. Tutug kelih/Bajang Bunga muang Truna Bunga, ngrajasewala muang ngrajasinga aranya malih, patut kawentenang yadnya matugtug kelih. Subagia yan prasida antuk ngetutang matatah, mapandes, rawuhing mawiwaha.
 - 2.9. Wenang mawinten sastra, pet wenten kahyune malajahin sastra, sane sampun wija aksaranya mangda sampunang tulah.
3. Upacara upakara inucap mamargi: Manista, Madia Motama, nganutin Sastra dresta muang sastra Agama, miwah adung ring Sima carane ring Seminyak.
4. Upacara Pawintenan manut sekadi pawos 43 ring ajeng, yaning prade malih wenten para warga makahyunan mawinten, upami: Ngamanguin ring sanggah Gede, Pura panti, Pura dadia, mewinten ngraga, prajuru taler patut nyaksinin tur ngwedarang ring Desa pakraman.

Palet 5

Indik Bhuta Yadnya

Pawos 53

1. Bhuta yadnya teges ipun mayadnya ring sarwa Bhuta-kalane, mangda sareng ngmolihang karahayuan, apan maka sami, sakaluirin maurip muang tumuwuh, ngastitiang mangda jagate karahayuan, luirnya:
 - 1.1. Yadnya sesa mesaiban-ngejot, punika katiba ring sarwa prani (saluirin sang majalan tangkahnyane nganteng tanah, luwire: jelati, uled, lelipi, muang salantur ipun). Tryak, sane mabatis akuweh, upami, lelipan, kekawa, yajnya panyabrananpadgata kala.
 - 1.2. Yadnya ring sarwa tumuwuh, napi malih taru sane tumbuh ring pakarangan, upami: poh, juwuk, muang akweh malih, patut ipun polih weton kadi kramaning manusa rikalaning tumpek wariga. Yaning tan sapunika, tan mari sang taru ring pakarangan: nglaranin, mrudanin, mancanin, mangkana kojaring sastra.
 - 1.3. Bhuta yadnya ring sakaluirin pati kawenang-wenang ngupakaren sarwa ingon- ingon rikalaning Tumpek uye.

- 1.4. Sakaluirin yadnya, mawates arahina/rerahinan, apaweton, apamedalan, enem (6) sasih, katur ring Dewa Bhatara wiadin ring kamanusan, muang ring atma, sesanane patut:
 - Byakalanin dumun, mangda sakaluwiring sane nyangkalanin, mancanaen, mrudanin, sami telas mararadan.
 - Prayascitain, mangda sakaluirin sane nyepungin, nyebelin, dados hening- nirmala.
 - Ulapin, yaning atma, dundun/tangiang, yaning wang maurip, kawukin jiwa-pramananyane, yaning dewa- Bhatara, mapakeling, mangda Ida matangi, apan pacang katurang pa-rerahinan utawi piodalan. Sapunika sesananya, mungguh- tedun pateh, kewala binayan pangonek, utawi uncar-uncaran.
2. Bhuta yadnya: ring sajeroning Bhuta yadnya wenten pawatesan, lwiripun: Bhuta yajnya sane Alit, ngawit saking segehan cacah, kepelan, punika wastanina pasegeh/segehan, wenang anggen ring panyabranan. Ngawit saking segehan agung, eka sata, panca sata, panca korsika, resi Ghana, manca klud, manca sanak Agung, tawur kasanga, nangluk mrana, kapungkur ngusabha Desa, punika caru ngaranya. Masuwe 30 warsa patut ngusabha Desa.

Pawos 54

Upacara tawur kasanga, kelaksanayang ring tileming kesanga:

1. Majeng ring ida Bhatara Kahyangan Tiga:
 - 1.1. Pangelong ping 13 melasti ka segara, kairing antuk sanak muang prabhawan Ida ring sawewidangan Desa Adat Seminyak.

PAMIDARTA: Lawa, mapiteges daun/sekar, daun kembang/bunga kembang. Pratiwimba: Ida Bhatara ring Kahyangan Tiga pinaka sarining, para sanak/ring soring Kahyangan Tiga pinaka daun Tunjung kembang, upami: Pura panti, Dadia, muang sewosan malih. Sekadi ring Besakih, Ida Bhatara Hyang Putra jaya pinaka Sari, Pura gelap, kiduling kreteg, ulun kulkul, Batu Madeg, punika catur lawan Ida Bhatara ring Besakih. Taler Pura pasek pande, sangging, ngranjing dados lawan Ida Bhatara ring Besakih, sapunika pategesing lawa.
 - 1.2. Upakarane ring segara, ka-entering antuk prajurune ring Desa muang Banjar sane ka-ampok olih Banjar, manut dresta.
 - 1.3. Pangelong ping 14, Ida Bhatara nyejer ring Pura Desa Bale Agung, irika Ida Bhatara-Bhatari sareng sami mabebawosan, bantangnya mangda jagate rahayu.
 - 1.4. Galah nyoreang pangelong ping 15, Ida bhatara ngluwur, ngaran nyineb, Bhatara-Bhatari sane sinanggeh lawa, budal ring payoganira sowang-sowang, sapunika taler sane wenten ring karang paumahan.
2. Sampun puput Bhatara masineb, wawu tawur kasange mamargi, kadi ring Sor:
 - 2.1. Ring tileming kesanga pangelong ping 15, ring sampune Bhatara-Bhatari ngluwur, kawentenang pacaruan manut genah.
 - 2.2. Sampun puput tawure mamargi, rarisang ngalaksanayang panyomya Bhuta-kala, masarana: masuwi, kasuna, jangu (tri ketuka), ma oboran ring karang pomahan, dulurane: belek, dangdang, yan ring Desa pakraman becik tabuhana gong balaganjur, wawu raris ngrupuk, ngaran ngeseng Dosa.
 - 2.3. Tengah wengi puputang pangrupukane, sampun ngawit ngineng-raga, ngentegang kahyun mangda suci hening.

1. Upacara rahina nyepi/sipeng, patut kamargiang kadi ring sor:
 - 1.1. Amati Geni tan dados maapi-api, ma-palalian, sajawaning: Madruwe rare durung mayusa tigang sasih, Matepetin anak sungkan, Katiban baya lampus.
 - 1.2. Amati karya, tan kengin nyambut karya, sajawaning pecalang Desa, prajuru Dinas miwah sang polih wakwakan (ijin) marupa ilikita saking mawa rat.
 - 1.3. Amati Lelungan, nenten dados malelungan/maleluasan.
 - 1.4. Amati lelanguan, tan kengin masuara gora, nabuhang gambelan, ngedig, kulkul muang selantur ipun.
2. Yaning prade wenten krama mamurug brata panyepian, keneng danda manut pararem, pecalang Desa muang nayaka dinas dados ngmargiang.
3. Riwusan rahina panyepian, benjangnya kewastanin ngembak Geni, tegesnya nglebarang yoga semadi, kadulurin antuk pangaksama, nyapsap-ngrapuh mala dosa, sareng para sameton krama Desa Adat Seminyak, maka cihnaning ngawitin isaka warsa.

SARGA V SUKERTA TATA PAWONGAN

Palet 1 Indik Pawiwahan

1. Pawiwahan, inggih punika patemoning purusa lawan pradana, malarapan patunggalan kahyun, pada suka-cita, kadulurin antuk upasaksi sekala- niskala.
2. Palaksana pawiwahan ring Desa Seminyak, luire:
 - 2.1. Papadikan, kamanggala antuk pakurenan.
 - 2.2. Yaning marangkat, mamargi paling riyin, wawu mawirasa/mlaku.
 - 2.3. Nyeburin utawi nyentana kabawos puput parisuda (sah) yaning sampun kalaksanayang upakara pamerasan.
3. Pidabdab sang pacang mawiwaha, patutnyane:
 - 3.1. Sampun munggah daha-teruna.
 - 3.2. Sangkaning pada seneng utawi pada suka-rena.
 - 3.3. Anut ring kocaping Agama/tan gamia- gamana.
 - 3.4. Yaning prade sewos Agama patut ngmargiang suda wadani riyin, kasaksenin antuk prajuru.
4. Tata kramaning marabian inucap, ring sampun nganutin tata Agama muang dresta, taler patut nganutin uger-uger sane kamargiang olih krama/pemerintah manut undang-undang perkawinan Republik Indonesia No. 1 warsa 1974, saha PP Republik Indonesia No. 9 warsa 1975.
5. Yan prade mamurug kecaping angka 4 ring ajeng, macihna antuk Tri Pramana, patut :
 - 5.1. Pangantene jagi kapalasang, saha keni danda manut pararem.
 - 5.2. Yaning prade kapaksa, ngrorodang, sang sane ngrorod miwah sang sane nyarengin mlegandang, keni danda manut pararem.

- 5.3. Panganten sane kapalasang, tur sang mamaksa mlegandang, keni danda manut pararem, maweweh mrayascitain Desa.
- 5.4. Prade wenten lumaksana Gamia-gamana, luihnya: ngambil semeton tunggal yayah-rena putra rupaka, putra tumin, muang gamia sewosan malih, wenang kadanda muang mrayascita Desa, manut pararem.

Pawos 57

1. Pawiwahan sane patut kamargiang ring Desa Adat Seminyak, yaning sampun :
 - 1.1. Awidi-widana, nistanya mabiakawonan.
 - 1.2. Polih pasaksian saking prajuru Desa muang Dinas.
 - 1.3. Kaungguhang ring ilikita, tur katebusang ring Sang ngawi wenang.
 - 1.4. Nawur prabia upasaksi pawiwahan, masarana antuk daksina masesari
2. Parabian sane kabawos tan patut, yan prade :
 - 2.1. Natab upakara sakaning mapaksa utawi kapaksa.
 - 2.2. Sinalih tunggil sang Mapabuncingan nenten rawuh miwah nenten wenten ilikita muang saksi.

Pawos 58

Tata Kramaning marabian patut kadi ring sor:

1. Sapasira ugi pacang mapawarangan, patut masadok ring prajuru, raris nglantur kaparitasang, manut tan manut pamargine.
2. Yaning mamadik pamargine, dudonane patut :
 - 2.1. Pakurenan patut mamargi ping tiga, saha sowang-sowang patut: kapertama antuk ngidih/masuaka utawi nunas, Pangambilan, Majauman.
 - 2.2. Risampun puput babawosan, sang wadon kaajak budal ka purin sang lanag, saha ngraris kamargiang upakara pabiakalan.
 - 2.3. Mangda tumus tur patut pamargin sang majangkepan sekala- niskala, nglantur kamargiang upakara nelokin, sakeng warga purusa, maduluran pajati katur ring pamrajan/sangguh sang wadon.
3. Yaning pamargine marangkat/ngrorod, sapatutnyane:
 - 3.1. Sang madruwe lanang, sagelisa ngawentenang pamlaku muang pajatian, majatiang antuk utusan, sakingrangnyane kalih diri, saha nenten dados kasepan ring arahina, macaciren antuk makta damar.
 - 3.2. Pawanengan tigang rahina, kawentenang pawirasan manut tata- cara:
 - Kakawitin antuk nunas geng sinampura majeng ring rama-renanya sang wadon, mangda ledang nyapsapang kaiwangan sang lanang, dening pamargine ngrorod, lanturang ngidih utawi nunas.
 - Subagia sida purna kayun sang nruwenang putri kadagingin pinunas sang mlaku rarisang misedekang mratyaksayang, indik dina padewasa pakrabkambene pacang rawuh.
 - Kacihnayang indik kapurusannyane, utawi yaning istri pacang ka adegang sentana rajeg, kapatutang ngidih anak lanang, kabawos pawiwahan nyeburin. Irika patut mamargi pameraan, tegap kamanggehang sentana nyeburin.
4. Yaning prade pajatine nenten katerima, pakurenan tetep mamargi ping tiga.

5. Piteges pakrabkambene, nyihnayang upacarane galang-apadang mapikuren duaning:
 - 5.1. Sajeroning pakrabkambene, sampun kamargiang sekala niskala, marupa jejauman muang banten widi-widana, pajati, pinaka sarana suci nunas wadone ring merajan kamulannyane, manut dresta ring Seminyak, puniki kabawosang Nelokin.
 - 5.2. Krab tegesnya ngaturang, kambe tegesnya nguningang. Krabkambe, tegesnya: ngatur-uningang ring Ida Bhatara- Bhatari, ring prajuru, ring Ida dane sareng sami. Pateh ring artosing: ulap-ambe, Ulap ngawukin aji tangan, ambe nyeritin. Ngula-ambe ngawukin/nyeritin.

Pawos 59

1. Pawiwahan punika mapiteges sang lanang merabi asiki, sapunika taler sawaliknyane, sajawaning wenten pasubaya sewosan.
2. Prade wenten logika-sanggraha, jantos ngwetuang bobotan patut:
 - 2.1. Sang mobotang nyakapang sang wadon, prade tan kahyun nyakapang, keni danda gung arta 500 jinah bolong, saha ngaturang pangrebuan ring Pura Desa. Maduluran malih ngupakara bobot nyane, muang ngupajiwain rarene riwekasan.
 - 2.2. Yaning tan wenten mariangkenin bobotane punika, patut kulawargan sang kabobotan, ngaturang pangrebuan ring Pura Desa, tur ngupakara sang mobot sapatutnyane mawastu rarene tan keneng candala, jantos tan kabawos pianak babijat/bibine jahat.
3. Prade wenten anak mamitra ngalang, tingkah polahe punika kasengguhang mamekelin Banjar, muang semara dudu, wenang prajurune netes, tur nuduhang mangda digelis majangkepan/masakapan yaning kapiwal, wenang keni danda panyapsap semara dudu, gung arta 1000 keteng jinah bolong, tur majanji wusan malaksana kadi ring ajeng. Yaning malih mamurug, keni danda nikel, napi malih yaning mamengkung, sampun langkungan ring ping tiga prajurune niwakang pamidanda tan katinutin, wenang keni danda kasepekan, tan polih arah-arah, tan polih suaran kulkul asing- asing swakaryanya. Kaping ungkur, yan jantos tigang pasangkepan wang ika tan nunas pangampura ring Ida dane krama banjar, tan nawur pamidanda sapatutnya, wenang kawusang makrama banjar miwah ma-desa ring Seminyak.
4. Yan prade wenten malaksana Dratikrama, drati, baburon, krama, ngaran tingkah, dratikrama ngaran tingkah kadi buron, luihnya: Pangina mataluh, taluhe dadi pitik, pitike dadi siyap/panglumbah, malih ngalumbahin panginane sane pecak nglekadang taluh ipune, ika ngaran drati krama. Yan ana wang maulah mangkana, pianak nyuang meme, manusa makrida ngajak buron, dahating cemer leteh ikang Desa Pakraman, wenang wang ika kena danda macaru ngresikin Desa antuk Caru pawalik- sumpah, nistanya caru resi Ghana muang manca klud, pararem Desa mastikayang.
5. Mungging tingkah pamargin asumundung anglangkahi karang hulu, kasukserah ring sang ngwarangang, upakarnya mapatiwangi.

Palet 2 Indik Panyapihan

Pawos 60

Pawiwahan prasida kawusang, malarapan antuk:

1. Palas marabi sangkaning suka-lila, utawi sangkaning wicara, nenten mrasidayang adung malih, nyapihan utawi nyapian.
2. Sakaluirin anak palas marabi, sangkaning pada lila utawi mawiwilan wicara, patut pamuputnyane ring kertha Negara/pengadilan. risampunya pada ngamolihang pamutus/keputusan pengadilan, sang prajuru raris nyiarang ring Desa pakraman, saha kapidanda mangda masamsam ring Bale Agung.

Pawos 61

Sulur palas marabian, prade silih sinunggil anyasar laku, cedangga/nenten sida nglaksanayang darmaning alaki-rabi, matilar nenten nguningang, tur pastika tan adung malih.

1. Prade wicarane mawiwit sakeng lanang, maka cihna:
 - 1.1. Istrine paradara, wakpurusa/langgah-langgana ring suami, degag ring rerama matuwa lanang-istri, nemah misuhin
 - 1.2. Amandel sanggama/ngambul bulan-bulanan jantos 6 sasih.
 - 1.3. Cedangga, nenten prasida matemtu semara.
2. Prade wicarane mawiwit saking istri, maka cihna:
 - 2.1. Suaminya nyolong samara/mamitra, angrabinin somah anak lenan, ngerabinin wong marabi/nyuang somah timpal.
 - 2.2. Tan maweh pangupa- jiwa jantos 6 sasih.
 - 2.3. Wandu, ngaran mati semaranya, taler kabawos cedangga.
3. Yaning sampun manut ring Tri pramana indik wicarane kang inucap ring angka 1 muang angka 2 wenang:
 - 3.1. Parabiane dados palasang.
 - 3.2. Katiwakin panawur danda manut pawos: 59 angka 3.
4. Yaning prade palas marabian sangkaning pada lila, patut:
 - 4.1. Nawur prabeya manut pawos 59 angka 3 pada atenga.
 - 4.2. Paguna kayan polih pahan pada.
 - 4.3. Bekel utawi tetatadan, kakuasan niri- niri, nanging yaning warisan, kakuasa antuk purusa.
 - 4.4. Ngaweruhin miwah ngupajiwain pratisentana, manut swadarmaning guru purusa.
 - 4.5. Pidanda penyapihan inucap ring ajeng, dados kamargiang risampune katiwakin pamutus olih sang rumawos, manut pawos 59 angka 3.

Pawos 62

Yaning prade riwekas, sang palas adung malih, patut:

1. Nglaksanayang upakara pabuncingan malih, kadi patut.
2. Keni pamidanda nikel saking palase dumun, yadiastun duk palase riyin sangkaning papa lila.

Pawos 63

1. Paindikan anak balu wenten kalih pawos, luire:
 - 1.1. Balu anak istri wit sentana (sentana rajeg) miwah balu luh boya sentana.
 - 1.2. Balu lanang sangkaning kapurusan, miwah balu lanang nyeburin.
2. Swardamaning Balu inucap, patut:
 - 2.1. Ngmanggehang satia pati brata, nenten dados ngmargiang para dara dratikrama, utawi nyolong semara.
 - 2.2. Wenang kwasa warisan pagunakayan sang suami sane ninggalin, nanging tan dados ngadol, makidihang, sajawaning sampun polih kebebasan saking pianak muang kulawargane sane pinih tampek pasemetonane.
 - 2.3. Dados ngidih sentana, prade sampun wenten pidabdab, sadurung silih sinunggil lampus, saha polih kebebasan saking kulawarga sang sinanggeh kapurusan.
 - 2.4. Kadadosang marabian malih nanging mangda polih paiguman saking putrane lanang istri, nanging mangda sampun munggah deha teruna, utawi saking kulawargane kapurusan.

Pawos 64

1. Balu kinucap nenten pageh, luirnya:
 - 1.1. Nyolong semara, paradara, wakpursa, ngaran degag.
 - 1.2. Matilar saking puri tanpagatra jantos 6 sasih.
 - 1.3. Lempas ring swadarmaning Balu, nenten prasida ngehehin solah, setata matungkas ring pituduh kulawarga saking kapurusan.
2. Yan prade mabukti sang Balu lanang utawi istri, nanging boya sentana rajeg, lempas ring darmaning kabaluanya, punika wenang:
 - 2.1. Katundung olih putrannyane, utawi olih kulawarga purusanya.
 - 2.2. Nenten polih upon- upon waris
3. Yaning balu pageh ring swadarma, prade katundung antuk kulawarga kapurusanya punika patut polih padum pagunakayanya.

Palet 3 **Indik Sentana**

Pawos 65

Indik sentana, wenten makudang- kudang rancan, luirnya:

1. Mungging pratisentana inggih punika, sentana sane medal saking pawiwahan.
2. Prade marabian nanging nenten numbuhan sentana, punika wenang ngidih sentana, nanging mangda ingkup paigumane ring semeton kapurusan, punika ngaran sentana paperasan.
3. Yaning wenten anak istri mobot tan kapalakuin olih sang ngawe bobotan, punika wenang idihang pasakapan ring sameton sane pantes tur kahyun, mangda rarene nenten inucap pianak babinjat riwekasan. Yaning legawa yayah renanya sang ibu sane lacur kabobotan, putranya wenang anggen sentana.

4. Yan wenten pianak Babinjat, ring tutug tigang sasih rarene, patut ngaturang guru piduka saking jaba Desa, nglantur nunas tirta pakuluh pangrapuh dosa, siratin ibu muang anaknya, wawu ipun dados mangubhakti ring Ida Bhatara sami. Ring umahnya taler ngmargiang panyapuh, ibunya karyanang sesayut panyampi, tunasang tirta pakuluh ring Bhatara Guru, hening nirmala sang rare katekang ibunya, tan kari pawakan Babinjat.

Pawos 66

1. Ngangkat sentana manut dudonan, patut maka cihna arta-brana paperasan, saha kasaksiang sekala niskala.
2. Sapa sira ugi pacang ngidih utawi nunas sentana sapatutnyane matur wiadin masadok ring prajuru, asasih sadurung panemayan paperasane mamargi.
3. Bendesa Adat, kawakilin antuk para Kelihan Suka-Duka, patut midartayang utawi nyiarang ring sawewidangan Desane. Sapa sira ugi rumasa nenten lila mangda di gelis mapakelingin sang prajuru, masengker kalih wuku, sadurung dina paperasane kamargiang.
4. Bendesa Adat, digelis mawosang utawi ngicenin pamutus catur dresta.
5. Prade sulur pamerane punika nenten manut kecaping ajeng, prajuru wenang ngandegang, utawi matemuang sang nyangkuti kelawan sang kesangkutin, saha ngawehin penuntun mangda wicarane punika, puput becik nganutin sesananing pasemetonan.

Pawos 67

1. Paperasan sane kepatutang ring Desa Seminyak, sekadi puniki, risampun maka cihna:
 - 1.1. Mawidi widana paperasan kamargiang.
 - 1.2. Kasaksinin antuk Prajuru Adat muang Dinas, saha kabawosang ring Desa.
 - 1.3. Wenten ilikita, sane ngunggahang tata-sulur pamargin pamerane.
2. sane kapatut anggen sentana:
 - 2.1. Jadma ma-Agama Hindu.
 - 2.2. Papernahan nedunang saking sang mameras.
 - 2.3. Yaning prade nenten wenten kulawarga saking purusa, wenang ngangkat sentana saking wadon, bilih-bilih taler nenten wenten, wawu dados sakita kahyun, utawi sekama-kama.
3. Dados ngangkat sentana langkungan ring asiki, lanang wiadin wadon.

Pawos 68

Swadarmaning guru rupaka, patut ngupajiwain saha ngweruhin pratisentana:

1. Maweh pangupajiwa manut patitis grehasta, mamuatang karahajengan pratisentana, antuk maweh upa bhoga/sandang pangan, miwah patiba jampi rikalaning gering.
2. Maweh pangupapira, ngaran pangajah manut patitis Brahmacari, ngamanggehang pawanengan anak masisya-sisyan/murid, nistanya mangda puput ring Sekolah Menengah Pertama.

3. Prade angka (2) kapurug, wenang sang guru rupaka punika kadanda manut pararem Desa, taler malih tan katinutin wenang kadanda manut pararem Desa.

Palet 4 Indik Warisan

Pawos 69

1. Warisan inggih punika tetamian sane marupa: pustaka, arta berana, karang kawis, saha ayah-ayahnya, ngupadi kasukretaning sekala niskala saking leluhur, marep ring prati sentana.
2. Kang sinanggeh warisan inggih punika:
 - 2.1. Druwe tengah, makadi Kahyangan utawi pamerajan. Pusaka : kris, tumbak, soca, muang sarana pamujan. Pustaka: lontar, buku, arta berana, emas-perak, karang kawis/ karang sawah muang ayahanya.
 - 2.2. Pagunakaya, tatadan, utawi jiwa dana.
 - 2.3. Utang wiadin piutang.
3. Wawu dados kebawos warisan, prade wenten:
 - 3.1. Sang mapiturun (pawaris)
 - 3.2. Turunan (ahli waris).
 - 3.3. Arta berana miwah tategenan utawi ayah-ayahan.
4. Munggwing waris sakadi ring sor:
 - 4.1. Kapertama pratisentana purusa, utawi saking predana, utawi sentana rajeg, sentana paperasan.
 - 4.2. Kapingkalih, prade nenten wenten sekadi ring ajeng, turunan purusa papernahan ngunggahang, makadi rerama misan, utawi mindon, utawi turunan purusa, papernahan, disamping makadi kaponakan misan mindon.
5. Swadarmaning ahli sapatutnyane:
 - 5.1. Nerima saha ngutsahayang tetamian pahan saking leluhurnya makadi ngremponin pamerajan utawi Pura saha pangupakara miwah aenyeledihin ayah-ayahan pawaris.
 - 5.2. Ngabenang pawaris saha nglanturang upakara sapuputnya.
 - 5.3. Nawurin utang-utang pawarisan antuk tetamiannyane.

Pawos 70

Pah-pahan warisan manut sekadi ring sor:

1. Ring sampune puput nglaksanayang upacara pitra yadnya, tur utang-utang sang pawaris sampun telas katawur buntas.
2. Pahan tetamian patutnyane pada, sajawaning wenten pasubhayan pawaris duke kanton nyeneng nguni.
3. Ahli waris wemang tan polih duman waris, sangkaning:
 - 3.1. Nilar Agama/ngutang sesanan kawitan.
 - 3.2. Alpaka guru rupaka, wak purusa, wak capala.
 - 3.3. Sentana rajeg muwah sentana nyeburin, kesah tur ngalap rabi malih, punika/ninggalin kedaton.

4. Prade sinangeh boya ahli waris, dados muponin waris, sangkaning:
 - 4.1. Sentana istri sadurunge kesah merabian, alpaka guru, logika sanggraha, mawastu madruwe putra, sentana inucap dados ngewarisin pagunakayan sentana luh inucap, makadi byange.
 - 4.2. Mulih Deha utawi teruna riantukan ring pawiwahan pecak sampun kabawos ninggal kedaton.
 - 4.3. Balu luh, wiadin nyeburin (boya sentana).
5. Pawaris kengin mapaweweh rikala kanton maurip, pinaka:
 - 5.1. jiwa dana tatadan utawi bekel punika maka cihna tetep ring pianak sane kesah mawiwaha.
 - 5.2. Pangupa jiwa paweweh padgata kala pawaris, maka muponin hasil kemawon.
 - 5.3. Padum among-amongan utawi reraksan, pahan waris padgata kala jantos padum jumenek, saking pawaris, ring ahli waris.

Pawos 71

1. Prade sajeroning kulawarga, wenten ahli waris langkungan ring adiri, sepatutnyane:
 - 1.1. Ngawentenang paigum indik padum waris inucap.
 - 1.2. Yaning nenten mresidayang ingkup, dados tunasang patatimbangan ring prajuru desa.
 - 1.3. Prade taler nenten cumpu ring pituwas prajuru, dados nembusang ring sang rumawos/pengadilan negeri.
2. Prade wenten karang kaputungan, wenang prajurune mawosin, nureksain sulur pakulawarganya, sila-sila raris nibakang ring:
 - 2.1. Ahli waris saking purusa.
 - 2.2. Papernahan kasamping, wantah nenten wenten papernahan ngunggahan.
 - 2.3. Taler nenten wenten angka 2.1. miwah angka 2.2, dados tiwakang ring wadon.
 - 2.4. Prade rawuh angka 2.3. ring ajeng nenten wenten, dados sekama-kama.

SARGA VI WICARA LAN PAMIDANDA

Palet 1 Indik Wicara

Pawos 72

Sane dados mawosang makadi mutusang wicara ring Desa, luihnya:

1. Salwirin wicara sane wenten ring banjar pakraman, kelihan suka-duka sane wenang mutusang, yaning wicara tunggal Banjaran.
2. Yaning wicarane bina Banjaran, Bendesa Adat sane wenang mutusang.
3. Prade sang mawicara nenten cumpu/nampi ring tata cara kelihan suka-dukane mawosang, dados nunas bebandingan utawi tetimbangan ring prajuru Desa.
4. Yaning pituwas prajuru desane taler tan katampi, dados wicarane punika lanturang ring sang rumawos ngaran pengadilan.

Pawos 73

1. Sahananing wicara sane mawiwit saking kacorahan, luwirnyane kasinanggeh nungkasin daging awig-awig, paswara lan pararem Desa, wenang bawosang premangkin, nenten ngantosang pasadok.
2. Sajabaning wicara sakadi ring ajeng, sapatutnyane nyantos sang nunas bawos.
3. Pa-nepase patut pastika, nyantenang iwang, malarapan Tri Pramana, ngaran: bukti, ilikita, muang saksi, tur tan maren nepek ring catur dresta, ngaran: kuna dresta, sastra dresta, sima dresta, muang loka dresta.

Palet 2 Indik Pamidanda

Pawos 74

1. Desa Utawi Banjar dados niwakang pamutus ring warga Desa utawi Banjar sane sisip.
2. Tatiwakan punika kamargiang saking Bendesa Adat utawi Kelihan Suka-Duka, nanging wantah nunggal-nunggal, manut ring dudonan.
3. Agung- alit pamindandane, manut ring sor singgih kasisipane, nenten maren ngupadi darma kawelas arsan, pinih ajeng maka buatan ngwetuang kasuda malan Desa, makadi ageng pamidanda, wijilan jinah bolong, patut kaanutang ring pamargin jinahe sane sampun ketah kamargiang antuk panegarane kadi mangkin. luwirnya:
 - 3.1. Dadosan utawi pamidanda arta, miwah nikel wiadin katikelang.
 - 3.2. Karandahin utawi karampas.
 - 3.3. Nunas pengampura utawi nyewaka.
 - 3.4. Nenten polih suaran kulkul, matehin pikeneh kapuwikan.
 - 3.5. Kararyang ma-krama saking Banjar utawi Desa.
 - 3.6. Upakara pangaskara/pangrebuan.

Pawos 75

1. Rikala pawanengan patut ngamedalang jinah papeson, urunan, dados utawi dedandan, ring sampune kaicen galah a-pasamuan, prade nyedokin, wenang kadanda nikel.
2. Risampune keni panikel, mawaneng malih a-pasamuan, taler malih nenten nawur, dados karandahin tur pikoli pangrandahane kadayaning sampun rawuh sengker nenten katebus, barang randahane dados kaadol sa-mael mael nyane.
3. Tata- cara ngrandahin utawi ngrampas:
 - 3.1. Kamargiang olih prajuru Banjar kasarengin antuk krama tigang diri maka saksi.
 - 3.2. Sang karandahin sangkaning lascarya ngambil barang, utawi nyawenin tanem-tuwuh, sakuehnya manut utang sang karandah.
 - 3.3. Sang prajuru miteketang, mangda barang sane karandah punika digelis katebus sadereng jagi kaadol.
 - 3.4. Prade pamargi ngrandahin taler tan kaanutin, tegesnya warga krama inucap nenten satinut ring sadaging Awig-Awig: pasuara, pararem, Banjar utawi Desa, wenang wong ika tan kaicen suaran kulkul, yan pradeipun madruwe karya suka-duka.

4. Ring sampune keni pamidanda kasampetin suaran kulkul, taler tan masalin pari polahnya, wenang krama inucap kararyang ma-krama Banjar utawi Desa, manut tata krama:
 - 4.1. Sadurung panemaya pasamuane ring Desa muang Banjar sane pacang ngwusang anak ma-krama, Banjar utawi Banjaran sane mamurug, patut prajuru Desa utawi Banjar, nunggal-nunggal ngwentenang sangkepan, ngupadi pamargine mangda rahajeng.
 - 4.2. Prade utsaha inucap nenten mikolihang, wawu kawentenang pasamuan Desa muang Banjar inucap.
 - 4.3. Pamargin angka 4.2. ring ajeng, kawacen antuk prajuru Desa, sawawaning ngwusang krama Banjar majalaran antuk punika, kelihan suka-duka makadon sang kawusang, nenten malih ma-banjar ring sawewengkon Desa Seminyak.

Pawos 76

Indik panyisip manut pawos 74 ring ajeng, Dados buntas yaning:

1. Krama sane rumasa uning ring kaiwangan, nenten saturut ring kadi sadaging awig-awig wiadin pasuara muang pararem Desa:
 - 1.1. Nyekang ring babanjaran.
 - 1.2. Keni sisip gung arta 10,000 wijinan jinah bolong, pangwantun kasudamalan Desa, saha ngaturang guru piduka ring Pura Desa utawi Bale Agung.
2. Swadarmaning prajuru:
 - 2.1. Kelihan suka-duka patut nerima paswakan krama inucap tur nguningang ring Bendesa Adat, lurah.
 - 2.2. Bendesa Adat ngrawuhang para Kelihan Banjar sami, buat nerima paswakan kramane sane mlakuang deweknyane iwang.
 - 2.3. Prade sampun kaanutin sakadi angka 1 ring ajeng, krama inucap wenang katampi, miwah kawacen ring babanjaran sane dumun.
3. Pidanda inucap maka tatiga, makadi ring kelihan suka-duka sane ngwidangin Banjar inucap, atenga ring rumawos, atenga ngranjing ring kas Desa.

SARGA VII NGWAH NGWUHHIN AWIG-AWIG

Pawos 77

1. Nguwah-wuhin Awig-Awig Desane puniki kamargiang antuk pasamuan Desa.
2. Pasamuan inucap mangda kasungkemin antuk pakarsan krama Desa.
3. Sadaging ngwah-ngwuhin mangda kadasarin antuk gilik-saguluk pikoli pararem.

Pawos 78

Indik pasamuan pacang ngwah-ngwuhin Awig-Awig kadi ring ajeng kamedalang olih Bendesa Adat, kelihan suka-duka, yadiastun niri-niri, napi malih sinarengan, manawita sangkaning aab jagat utawi panemaya.

SARGA VIII PAMUPUT

Pawos 79

1. Awig Awig puniki, kawastanin **AWIG-AWIG DESA ADAT SEMINYAK**.
2. Awig-Awig puniki kamargiang ngawit saking dina kararemin

Pawos 80

1. Salwirin sane wenten saderengnya patut kaanutang ring sadaging Awig- Awig puniki.
2. Sakalwirin sane durung kabawos ring sajeroning Awig-Awig puniki, patut kalaksanayang manut tata cara sane sampun ketah mamargi, (sima dresta utawi purwa dresta), kadulurin antuk pararem Banjar utawi Desa.

Pawos 81

1. Awig-awig puniki kararemin duk rahina Soma Icaka warsa 1919 tanggal Masehi 22 Sepetember 1997 Ring Pura Desa, Desa Adat Seminyak.
2. Awig-awig puniki kalinggatanganin antuk Bendesa Adat Seminyak, kasarengin antuk Kelihan Suka-Duka, saha kesaksiang olih Kepala Lingkungan Seminyak, Kepala Kelurahan Kuta, Camat Kuta, Ketua Badan Pelaksana Pembinaan Lembaga Adat Kabupaten Badung lan Bupati Murdaning jagat Badung.

KALINGGATANGANIN OLIH

Kelian Suka Duka
Br. Seminyak

Kelihan Suka Duka
Br. Tatag Seminyak

I WAYAN KARIASA

I NENGAH RASNA

Bendesa Adat **SEMINYAK**

I WAYAN MARA

KASAKSIANG OLIH

Kepala Kelurahan Kuta

Kepala Lingkungan Seminyak

I WAYAN GERIYA

Nip:

I WAYAN DARSANA

Badan Pelaksana Pembinaan Lembaga
Adat Kabupaten **BADUNG**

Camat **KUTA**

I GUSTI PT. OKA SWECA, SH.

Nip:

DRS. I.B. MANU MANUABA

Nip: 600005119

Bupati Kepala Daerah Tk. II Badung

I GUSTI BAGUS ALIT PUTRA

PAKELING

Pangripta awig-awig

Dudonan juru pangrencana

Pamidabdab

- I. Fakultas Hukum dan Pengetahuan Masyarakat Universitas UDAYANA Denpasar-Bali.
- II. Majelis Pembina Lembaga Adat: Badan Pelaksana Pembina Lembaga Adat Kabupaten Badung dan Badan Pelaksana Pembina Lembaga Adat Kecamatan Kuta.



PETA WEWIDANGAN DESA ADAT SEMINYAK

